

TROIAD

SINEMA E BREZHONEG EVIT AR SKOLIOÙ
KENURZHIET GANT DAOULAGAD BREIZH

DOZER AR GELENNERIEN
KINNIGET GANT DAOULAGAD BREIZH



Ur film bevaat
sevenet gant Claude Barras

SOVAJED

2024 / lezh27 / Suis - Frañs - Belgia / Haut et Court
Aduouezhiañ e Brezhoneg: Dizale



En doser-mañ e kavoc'h ar respontoù da fichenoù ar skolajidi ha kinnigoù abadennoù da gas er c'hlas war-lerc'h bezañ bet gwelet ar film. Evel-just, an holl draoù a vo kavet en doser-mañ n'int nemet kinnigoù, deoc'h da azasaat an abadennoù d'ho c'hoantoù, d'ho ezhommoù, ha da ezhommoù ha c'hoantoù ar skolajidi !

Digoradur

- 1/ Diverrañ ar film 3
- 2/ Kinnig ar film 3
- 3/ A-raok ar skignadenn : eskemm diwar-benn ar skritell 4

Labour gant ar vugale

- 1/ Kompren an istor 5
 - a/ Lakaat ar skeudennoù en urzh
 - b/ Komprenet 'p eus an istor ?
- 2/ E pelec'h emaomp ? 6
 - a/ Enezenn Borneo / Ar forest trovanel gleb
 - b/ An orangoutan
 - c/ Ar Penaned : piv int, penaos e vevont ?
- 3/ An diforestañ 10
 - a/ Petra eo an diforestañ ?
 - b/ An eoul palmez
 - c/ Hon efed war an en-dro : petra a c'hellomp ni ober, amañ ?
- 4/ Ur preder war an disheñvelded 12
 - a/ Bezañ disheñvel : darempred Keria ha Selai
 - b/ Piv eo ar "Sovajed" ?



1/ Diverrañ an istor

E Borneo, war lez ar c'hoad trovanel, ez eus bet repuget un orang outan bihan gant Keria. Kavet eo bet er blantadeg gwez-palmez ma labour he zad enni. Krak d'ar mare ma tegouezh he c'henderv yaouank Selai da glask bod en o zi a-benn pellaat ouzh ar c'henstourm a zo savet etre e familh kantreidi ha tud an embregerezh koadourien. Selai, Keria hag an orangoutan bihan a zo vont da skoilhañ ouzh distrujerien koadeier o hendadoù, en arvar da vezañ diskaret mik. Ha Keria, evel-se, a zesko hiroc'h diwar-benn he re.

2/ Kinnig ar film

“Sovajed” a zo eil film hir Claude Barras, war-lerc'h “Me Kourjetenn”, deuet maez e 2016, a oa bet advouezhiet e brezhoneg ivez.

“Sovajed”, evel “ Me Kourjetenn”, a zo filmoù bet savet e stop motion. Setu amañ ul liamm evit mont da welet ur rann Na petra 'ta diwar-benn ar stop motion evit komprenn gwelloc'h penaos e ya en-dro : https://www.youtube.com/watch?v=t0MIC_1L4k8&ab_channel=France3Bretagne

Palioù ar film a zo liesseurt : lakaat da huñvreal gant skeudennoù forest vurzhdus Borneo, lakaat da c'hoarzhin gant troioù-kamm hon harozed, bezañ frommet gant an diaesterioù kavet war an hent, met ivez prederiañ, war hor plas war an Douar, war hon darempred gant an Natur, ha war ar pezh a vez distrujet gant an Dud.

Peadra da gaout kaozeadennoù dedennus er c'hlas war-lerc'h ar film !

Claude Barras a zo bet e Borneo evit prientiñ e film. Tremenet 'neus amzer gant ur familh a vev evel hini Selai, er forest, evit kaout skeudennoù tost deus ar gwirionez, memes ma 'neus empennet ur bern traoù evel-just.





3/ A-raok ar skignadenn : eskemm diwar-benn ar skritell

Evit sikour ar vugale da vezañ muioc'h enbarzhiet er film pa voc'h er sinema, brav eo eskemm en a-raok o sellet deus ar skritell asambles.

Setu ul listenn goulennoù evit sikour !

- Peseurt tudennoù a vez gwelet ? Petra emaint oc'h ober ? Ouzh petra emaint o sellet ? Peseurt tro-spered a zo ganto ? Penaos int gwisket ? Peseurt perzhioù boutin o deus, ha petra 'zo disheñvel etrezo ? Peseurt darempred a zo etrezo ? d'ho soñj ?
- Pelec'h emaint ? Petra a vez gwelet tro-dro dezho ? Daoust hag e tremen an istor e Breizh ? Pelec'h neuze ?
- Da beseurt mare deus an deiz ?
- Peseurt trouzioù a vez klevet d'ho soñj ?
- Petra a zo skrivet ouzh ar skritell ? (An titl, anv ar seener,....) Petra dalvez an titl-se ? Petra er skritell a seblant liammet gant an titl ?
- Gant tout an dra-se, galloud a rit empennañ un tammig petra a dremen er film ?





LABOUR GANT AR VUGALE

1/ Kompren an istor

Evit gellet eskemm war ar film, ezhomm 'zo kaout soñj dioutañ. Pouezhus eo kemer amzer evit degas da soñj d'ar vugale eus elfennoù an istor, ha gwiriañ eo bet komprenet gant an holl.

ch/ Lakaat ar skeudennoù en urzh (FICHENN 3)

→ Respontoù:

- ① Keria hag he zad a zegemer Oshi, ur babig marmouz, peogwir eo bet lazhet e vamm
- ② Selai a zeu da vevñ ti Keria
- ③ Tec'hout kuit a ra Selai evit distreiñ d'e gampadur
- ④ Keria en em goll er forest o klask adtapout Selai
- ⑤ Keria, Selai hag Oshi a dremen un nozvezh er forest
- ⑥ Oshi a zo dantet gant un naer
- ⑦ Keria a zebr gant familh Selai ha Jan
- ⑧ Ar goadourien a zistruj kampadur familh Selai
- ⑨ Keria a lak karr-samm ar goadourien da darzhañ
- ⑩ Ur vamm Orangoutan nevez 'vez kavet gant Oshi

b/ Komprennet 'peus an istor ? (FICHENN 2)

Respontoù :

1-B, 2-CH, 3-A ha B, 4-B ha CH, 5-A, 6-CH, 7-A, 8-CH, 9-B, 10-A, 11-A, 12-B





2/ E pelec'h emamp ?

a/ Enezenn Borneo / Ar forest trovanel gleb

Galloud a rit kregiñ o lakaat ar skolajidi da lavar ar pezh a ouzont dija.


Borneo a zo un enezenn vras-tre, e penn all ar Bed e-keñver Breizh, e kenvandir Azia (da lec'hiañ ouzh ar gartenn). Borneo 'zo anv an enezenn, n'eo ket hini ur vro. Teir bro disheñvel a zo e Borneo : Malaysia, Indonezia (an daou se a zo ouzhpenn e Borneo, peogwir int strolladoù inizi) hag ar Brunei.

Kinnig d'ar vugale lec'hiañ broioù anavezet gante marteze tro-dro da Vorneo : Aostralia, Thailand, Sina, Indez,... Hag ar meurvorioù : Indian deus un tu, Habask d'an tu all.

Galloud a rit profitañ eus al labour-se evit diskouez ur gartenn kreizennet en Azia d'ar skolajidi, evit diskouez dezho ez eus modoù all da skeudenniñ ar Bed.



Borneo a zo war ar c'heheder, setu perak eo tomm du-se. Evel an holl inizi a zo a-live gant ar c'heheder, Borneo a zo gleb a-drugarez d'ar glav a gouezh kalz, klaz muic'h evit e Breizh ! An hin-se, tomm ha gleb, a vez anvet hin trovanel, peogwir e vez kavet seurt hin tro-dro d'ar c'heheder, etre an div drovan. (E glas amañ dindan)



Af	BWh	Csa	Cwa	Cfa	Dsa	Dwa	Dfa	ET
Am	BWk	Csb	Cwb	Cfb	Dsb	Dwb	Dfb	EF
Aw	BSh	Cwc	Cfc	Dsc	Dwc	Dfc		
BSk				Dsd	Dwd	Dfd		

Ul lodenn vras deus enezenn Borneo a zo goloet gant forestoù trovanel. Ar forestoù-se a zo pinvidik-mor a-fed plantoù ha loened. An en-dro a zo deus ar c'hentañ evito : tomm eo an amzer a-hed ar bloaz, hag ar glav a gouezh puilh. Ul lodenn vras deus al loened hag ar plant a vez kavet du-se ne vezont kavet e lec'h all ebet : ne c'hellont bevañ nemet er forestoù trovanel.

Ar c'hoad trovanel brudetañ a zo an hini brasañ : an Amazonia, en Amerika ar Su. Met bez ez eus re all, evel hini Borneo da skouer, met ivez forestoù trovanel Afrika hag Aostralia.

Enklask : Galloud a rit ober ul labour enklask diwar-benn al loened a vez kavet er forestoù trovanel. Rannet e vo ar c'hlasad e strolladoù bihan 2 pe 3 skolajiad. Pep strollad a zibabo ul loen a vev er forest trovanel (posupl eo labourat war loened Borneo nemetken, pe ledanaat al labour da forestoù trovanel all er Bed), hag a raio ur c'hinnig bihan d'ar c'hlasad. Ar fichenn diwar-benn an orangoutan a zo izeloc'h a c'hell reiñ harp dezho. Ar pal a zo diskouez liesseurtes al loened o vevañ du-se, hag ar c'holl a vefe ma zafent da get.



b/ An orangoutan (FICHENN 3)

An orangoutan a zo ur spesad marmouz bras, a vev en inizi Borneo ha Sumatra. Beviñ a ra er forest trovanel gleb. Al lodenn vrasañ deus e amzer a dremen er gwez, o klask boued.

An orangoutan en deus blev rouz/ruz o liv. Divrec'h hir-tre en deus.

E vent a zo etre 1m10 hag 1m40, e bouezh etre 40 ha 90kg.

Debriñ a ra dreist-holl frouezh, met ivez plant a-wechoù, hag amprevaned.

An orangoutan a zo ur bronneg. Ar pazed o deus ur babig bep 8 bloaz tamm-pe-damm.

Gwechall-gozh e veze dioute war un dachenn kalz brasoc'h, bremañ ne vezont kavet nemet war inizi Borneo ha Sumatra. An orangoutan a zo en arvar bras da vont da get, dre fazi an diforestañ, hag ar cheñchamant hin. Posubl eo ne vefe ket dioutañ mui a benn un nebeut degadoù a vloavezhioù.



c/ Ar Penaned

Ar Penaned a zo ur bobl a-orin deus enezenn Borneo. Bez ez eus war-dro 10 000 anezho hiriv an deiz. En doare hengounel e vezont kutuilherien chaseourien : da lâret eo e vevont gant ar pezh a vez dastumet ha chaseet gante en natur, ha kantreidi, da lâret eo ne vevont ket en un ti a chom bepred er memes lec'h, met fiñval a reont er c'hoad evit kavout boued. Cheñchet eo o mod buhez tamm-ha-tamm, ha bremañ al lodenn vrasañ deus ar Penaned a vev e kêriadenoù bihan etrezo. Met un nebeut familhoù a vev c'hoazh evel o hendadoù, o kantreal, evel familh Selai.

Chaseal a reont dreist-holl gant ur strinkerez, a vann biroù ampoezonet (ar poezon a zo sabr ur wezenn).



Selai gant e strinkerez



Abaoe 30 vloaz bennak, ar Penaned a zo o stourm evit gellet kenderc'hel da vevañ evel m'o deus c'hoant, gant o boued, o sevenadur, o c'hredennoù. Klask a reont gwareziñ ar forest, a zo o zi, hag a vez lakaet en arvar gant an diforestañ. Kement-se a zo gwir evit an holl bobloù a vev e mod-se er Bed a-bezh.

Ar Penaned (FICHENN 4)

Evel-just e vo kalz muioc'h skouerioù evit mod Breizh da vevañ eget evit hini Selaï, peogwir e anavezont kalz muioc'h ar mod beviñ-se. Kavet e vo ganeoc'h e fichenoù ar skolidi un nebeut skeudennoù deus ar film evit kas d'ho soñj traoù 'zo.

Sellit en-dro deus ar mare-se deus ar film evit kaout soñj: senenn ur pred penan (teul senennoù da adwelet)

→ **Respontoù :**

Un nebeut skouerioù respontoù (evel-just 'zo ur bern respontoù all!)

	Breizh	Penan
Lec'h kousket	<i>Un ti</i>	<i>Kampadur, savet gant ul lamin-toro</i>
Boued	<i>Toazennoù, chokolad,... Prennet er gourmarc'had,...</i>	<i>Ar pezh a vez kavet er c'hoad : loened (moc'h, sarpanted,...), pesked, plant...</i>
Deskadurezh	<i>Er familh hag er skol</i>	<i>Gant tud ar meuriad, deskiñ a ra ar pezh a zo ezhomm evit beviñ er c'hoad : chaseal, anavezout ar plant,...</i>
Dilhad	<i>Tee-shirt, bragoù,...</i>	<i>Ur berwisk</i>
Dudioù	<i>Sinema, football,...</i>	<i>Sonerezh hengounel, met ivez sonerezh a-vremañ !</i>



3/ An diforestañ

a/ Petra eo an diforestañ ? (FICHENN 5)

Lakaat ar skolajidi da lâret tout ar pezh a ouzont dija diwar-benn an diforestañ.

Reiñ an dielfennadur dezho : an diforestañ a zo ar fed da droc'hañ gwez ur c'hoad, evit sevel e plas ur park evit gounid plant a vo gwerzhet war-lerc'h. E Borneo e vez plantet gwez palmez da skouer.

Posupl eo kenlabourat gant ar c'helenner war an arzoù-kaer evit kemer perzh en obererezh kinniget gant skipailh ar film asambles gant Greenpeace ha Foodwatch :

<https://www.sauvages-lefilm.com/wp-content/uploads/2024/09/SAUVAGES-FICHES-VF-dessinez-la-deforestation.pdf>

Ar c'hinnig a zo tresañ ul lec'h a-raok an diforestañ ha goude.

Evit kaout mennozhioù traoù da dresañ e c'hellit implijout al labour graet diwar-benn loened ar forest, ober enklaskoù ouzhpenn diwar-benn plant ar forest marteze, gant sikour ar c'helenner war skiantoù an douar, ha kemer harp ouzh un nebeut skeudennoù tennet diouzh ar film (adkavit anezho e fichenoù ar skolajidi).

Ar pal a zo lakaat ar skolajidi da dresañ an diforestañ, da skrivañ un destennig evit lâret ar pezh a soñjont deus an dra-se (ur skouer a zo war al lec'hienn), ha da gas tout an dra-se d'an Elysée (digoust eo kas ul lizherenn dindan 20g d'an Elysée).

Peadra da gaout un obererezh a vesko an arzoù-kaer, ar geografiezh, ar biologiezh, hag ur preder politikel.

Galloud a rit prederiañ asambles gant ar skolajidi war efedoù an diforestañ war ar plant (er plantadegoù n'eus nemet ur seurt plant, gwez palmez, er c'hoad ez eus miliadoù a blant disheñvel...), war al loened (rediet int da dec'hout kuit, n'o deus lec'h ebet evit beviñ, na boued mui, nebeutoc'h-nebeutañ a blas a zo evito, mont a reont da get...), ha war an dud o vevañ er c'hoad, evel ar Penaned (rediet int da vont kuit, beviñ e kêrioù padal ne fell ket dezho, n'o deus ket boued mui, na plant evit bezañ pareet...)

Goude al labour-se e c'heller kaozeal diwar-benn an abegoù a lak ar Penaned da stourm evit gwareziñ ar forest, evit gwelet ha komprenet mat int bet.

Hag ar pennad-mañ : https://www.lemonde.fr/planete/portfolio/2019/01/14/en-malaisie-si-on-detruit-la-foret-de-sarawak-c-est-notre-ame-que-l-on-detruit_5408833_3244.html





b/ An eoul palmez (FICHENN 6)

An Eoul Palmez a zo un eoul tennet diouzh ar frouezh a vez kavet er gwez palmez. Ar gwez palmez a gresk en hinoù trovanel.

An eoul palmez a zo an eoul a vez implijet ar muiañ er Bed. Da gentañ peogwir eo marc'had-mat-tre da broduiñ, met ivez peogwir eo aes-tre da implijout : tu 'zo mirout anezhañ e-pad pell amzer, ha n'eo ket re zourek.

Evit an abegoù-se e vez implijet kalz an eoul palmez evit fardañ boued industriel : gwastili, toazoù da ledañ, dienn-skorn, diennoù. Met implijet vez an eoul palmez ivez evit produoù ar sal dour (gel emwalc'hiñ, ruz muzelloù,...). Memes en eoul-tan a vez lakaet en otoioù e vez kavet eoul palmez ! Gant div vro nemetken e vez produet 85% deus eoul palmez ar bed : Indonezia ha Malayzia (Borneo a zo ul lodenn deus an 2 vro-se). Al lodenn vrasañ deus an eoul palmez-se a vez ezhporzhiet, da lâret eo kaset da vroioù all, dreist-holl broioù pinvidik, evel re Europa hag Amerika an Norzh.

Produiñ eoul palmez a zegas kalz diforestañ, peogwir e vez diskaret ar forest trovanel evit plantañ gwez palmez.

An eoul palmez a zo an eoul a vez implijet ar muiañ er Bed → **Respont : gwir**

Ker-tre eo da broduiñ → **Respont : gaou**

Servijout a ra dreist-holl da vouetañ ar chatal → **Respont : gaou**

Servijout a ra da fardañ boued industriel → **Respont : gwir**

Servijout a ra da fardañ eoul-tan an otoioù → **Respont : gwir**

En Indez hag e Sina e vez produet al lodenn vrasañ deus an eoul palmez → **Respont : gaou**

Al lodenn vrasañ deus an eoul palmez a vez ezhporzhiet → **Respont : gwir**

c/ Hon efed war an en-dro

Ur wech komprenet mat penaos e ya en-dro an diforestañ, e c'heller prederiañ war ar pezh a c'hellomp ober. Ar pal a zo lakaat ar vugale da gompren efed hor mod da vevañ war an en-dro. An holl draoù a vez debret gante, a vez implijet gante, a zo bet krouet en ul lec'h bennak er Bed, hep na ouifent penaos resis, na gant peseurt efedoù el lec'h produiñ.

Ret eo diwall amañ nompas bezañ kenteliour.ez. Ar pal n'eo ket lâret e vezer drouk o tebriñ tra-mañ-tra, an traoù a zo kalz luzietoc'h evit se, pep hini a ra ar pezh a c'hell er Bed lec'h ma vevomp. D'ar gelennerien.ezed da nompas disoñjal ez eus abegoù ekonomikel a lak familhoù 'zo d'ober dibaboù e-keñver ar boued a vez prenet gante. Evit an abeg-se eo suroc'h kemer skouerioù gant ar boued a vez kavet er c'hantin.

Tu 'zo ober ul labour enklask war etikennoù ar boued a vez kavet er skol, evit gwelet hag ez eus eoul palmez e-barzh. Tu 'zo prederiañ war orin ar boued a vez debret er c'hantin : ar bananez, ar chokolad, pe c'hoazh ar frouezh hag al legumaj a vez debret da vareoù pa ne greskont ket sañset nepell deus amañ. Tout-se a zo bet savet e broioù all, alies broioù paouroc'h evit hon hini, gant efedoù a c'hell bezañ grevus-tre war en-dro ar broioù-se.

Tu zo prederiañ asambles war ar pezh a c'hellfe bezañ implijet e plas ar produioù fall evit an en-dro : peseurt boued 'neus an efed bihanañ war an en-dro ? Ar boued simplañ (n'eo ket treuzfeurmet, pe an nebeutañ posubl), en deus beajet an nebeutañ (e Breizh e kresk kalz avaloù da skouer !), hag na vez ket bannet.

Dedennus eo kaozeal eus an efed a c'hell kaout pep hini. Memes ma 'neus pep den un pouezh bihan-tout, seul vuioùc'h a dud a vo oc'h ober strivoù, seul vrasoc'h e vo an efedoù ! Met ar strivoù hinienel n'int ket trawalc'h, ret eo ivez d'ar gouarnamantoù kemer o c'hirievezhioù.

E liamm gant ar film 'zo bet lañset ul lec'hienn internet gant ur bern mennozhioù traoù d'ober evit sikour. Hervez pep kelenner.ez da welet ma n'em sant en e.he aes da gaozeal deus se e klas, pe gant ar familhoù. <https://www.sauvages-lefilm.com/>



4/ Ur preder war an disheñvelder

a/ Bezañ disheñvel (FICHENN 7)

Sellit en-dro deus ar mare-se deus ar film evit kaout soñj : senenn e porzh ar skol (teul senennoù filmoù da adwelet)

- Darempred Selai ha Keria

Unan deus palioù ar film “Sovajed” a zo degemer an disheñvelder. E penn-kentañ ar film, Keria ‘zo drouk gant Selai, a zo disheñvel diouti. Tamm-ha-tamm, Keria ‘zo vont da sellet dreist he raksoñjoù, evit dizoloiñ he c’henderv, e vod da vevañ, hag ar sevendadur Penan, a zo ivez hec’h hini, memes m’eo bet troc’het diouti.

Kinnig a reomp deoc’h labourat war ur senenn bouezhus er film evit kompren an dizegemer. Er senenn-se, mignonezed Keria a ra goap deus Selai, lakaet diaes peogwir emañ er skol evit ar wech kentañ. E-lec’h difenn he c’henderv, Keria a ra goap ivez deus Selai.

Setu senario ar senenn-se, ha tri c’hinnig labour adalek ar senenn.

- Dielfennañ ar senenn

Ur wech lennet ar senenn gant ar gelenner.ez, ha labouret asambles war ar geriaoueg evit bezañ sur eo bet komprenet mat pep tra, setu un nebeut goulennoù da brederiañ asambles. Bewech ‘zo meur a respont posubl !

- Perak vez graet goap deus Selai gant mignonezed Keria ?

- Penaos e reont goap outañ ? (Respontoù posubl : keñveriañ a reont anezhañ ouzh ul loen, lâret a reont ez eus ur «goueziad» anezhañ.

- Penaos en em santfec’h o vezañ e plas Selai ?

- Ha penaos en em santfec’h o vezañ e plas Keria ? Perak d’ho soñj ne zifenn ket Selai, hag e tiviz ober goap dioutañ ?

- C’hoari ar senenn :

Ar pal amañ a zo dont a-benn da embann tro-spered an tudennoù dre an ton implijet. Ma vez ezhomm ez eus tu ouzhpennañ gerioù en destenn evit diskrivañ ar mod da zispakañ pep frazenn : lakaet diaes, goapaus, diseblant, fuloret, heuget,...

Evit lenn a vouezh uhel ez eus ezhomm da gaout 4 bugel, ma vez c’hoariet ar senenn ez eus tu ouzhpennañ tudenn Selai. An dudenn-se ne lâr netra, met tu ‘zo diskouezh e frommoù dre e emzalc’h, e jestroù, e zremm,... Kement-se a c’hell lakaat an dudenn-se da vezañ diaes da c’hoari evit ar vugale, met dedennus eo klask diskouezh ez eus ur bern fromoù a dremen hep bezañ lâret.

- Cheñch ar senenn

Ha bremañ, deoc’h c’hwil da ijinañ un fin all evit ar senenn ! Ur tammig e mod an “teatr forum”, tu ‘zo deoc’h lakaat ar vugale da brederiañ war ar mod ma c’hellfe tremen an traoù en un doare all, pozitiveloc’h. Penaos ‘nije Keria gellet ober mod all ? Ma vijec’h bet en he flas, petra ho pefe graet ? Petra ‘n ije Selai gellet ober mod all ? Adalek ar preder-se, ez eus tu skrivañ ur stumm nevez deus ar senenn, ha c’hoari anezhañ.

Ur wech graet al labour-se, tu vo klask kaout soñj deus penaos e cheñcho an darempred etre Selai ha Keria. Penaos e teu da vezañ an darempred-se ? A-drugarez da betra e cheñch an traoù tamm-ha-tamm ?



b/ Piv eo ar Sovajed ? (FICHENN 8)

Tu 'zo kregiñ gant ur preder war ar ger "Sovajed". Klask gerioù heñvelster (feuls, didruez, sot,...), hag ar gerioù enep-ster (desket, sevenaet, fur,...)

Tu zo prederiañ ivez war ar pezh a vez anvet "Sovaj" : tud, loened, plant, lec'hioù,...

Er film, ar ger-se a zo en titl, ur ger pouezhus eo neuze. Implijet e vez anezhañ gant tud disheñvel en istor, evit komz deus tud disheñvel.

→ **Respontoù :**

- **Tad Keria** a gomz deus ar goadourien 'zo o paouez lazhañ mamm Oshi.
- **Mignonezed Keria** a gomz deus Selai ha deus ar Penaned.
- **Paotr ar blantadeg** a gomz deus an dud a-orin deus Borneo, n'int ket gwenn eveltañ.
- **Selai** a gomz deus e familh Penan.

Gwelet 'vez e vez implijet ar ger «sovaj» evit komz deus ar penaned kenkoulz eget deus ar goadourien Tu 'vo sikour ar vugale da brederiañ war ar pezh a zo gouez, pe sevenaet. Daoust hag eñ e vezer sevenaet o vezañ gwisket gant ur roched ha bragoù, hag o kousket en un ti ? Pe o toujañ deus al loened, deus an natur ha deus ar re all, memes ma 'z int disheñvel ?





Teuliad azasaet gant Manon Renault
Diwar an doser pedagogel savet gant Zero de conduite - www.zerodeconduite.net
Adlennet gant Lena Catalan Marcos, kempennet gant Marianne Larvol

Gouzout hiroc'h war ar film war :
<https://www.hautetcourt.com/animation/sauvages/>

DAOULAGAD BREIZH
13 straed/rue Michel Le Nobletz 29100 DOUARNENEZ
02 98 92 97 23 - contact@daoulagad-breizh.org - www.daoulagad-breizh.org

